

ditte guerre, ains que nous fussiens perpaies des dites derrains quinze mil lb. de Par(is) v ains que nous eussions commenciet à faire le dit seruice en ceste guerre, nostre volentez et entente sunt, que nous le seruiron a chinq cens homes darmes en une autre guerre, que il aueroit contre qui que ce soit, horsmis et exceptez . . le roi et le empereour de Rome, qui seroit obediens fils de sainte eglise, le archeuesque de Cologne et tous chiaus, qui sunt v seroient cousin, procain v home de fief a nous . . euesque, mes que nostre dit cousin v home de fief ne vosissent aidier autrui, qui aueroit guerre contre le dit . . roi de France, et que la guerre ne les touceroit en chief por cause de lor heritage en boine foid seins malengien. (5) Et ou cas que les personnes deuant exceptees v aucune di celles vorroient greuer v damagier le dit . . roi de France v son roiaume, dont il ne seroient chief de guerre por cause de lor heritage, nous euesques lui deuons faire le dit seruice, si comme desus est contenu seins fraude et seins barat. Et auant que nous le seruons en la ditte guerre de Engleterre ne en autre, nous deuons auoir entirement de lui le derrain paiement des dittes quinze mil lb. de Par(is) auoec les dittes cinquante lb. Torn(ais) et les gages de nos dittes gens por un mois, si comme desus est deuiseit. Et selonc ce que li dis . . rois de France auera mestier de nostre seruice en sa guerre contre le dit . . roi de Engleterre v contre autre persone, qui ne soit desus exceptee, et selonc ce que nous le seruiron bien et loialment, il nos doit et a promis a bien proueoier et remunerer conuenablement ensi que nous auons esperance principalement en lui et en sa bonteit. (6) Item il nos a encouent et promis en boine foid loialment, que de la ditte guerre contre . . le roi de Engleterre ne contre le dit Loys de Bawiere ne contre autre persone v lor alliies, adherens, aidans et confortans li dis . . rois de France ne fera pais, triues ne autre acord, que il ne mette et encloe la dedens nous, nos gens, nos aidans et confortans et nostre pays, si comme lui meimes, et que il nos aidera et confortera loialment en boine foid a son pooir contre tous chiaus, qui nos vorroient greuer v damagier por occoison de lui v de sa guerre, et que de cesci jour en auant il nos sera propices et fauorables en toutes les besognes iustes v raisonnables, que nous lui supplierons v requerrons por nous, por nostre eglise, nos gens et nostre pays, ensi que nous auons en lui grant esperance. En tesmoing des queles choses nous auons fait seieller ces presentes lettres de nostre grant seiell.